



INTRODUCZIUN

DAD ANDRI CASANOVA-BAUMGARTNER

Per igl evangeli tenor Gion ein ils plaid da cumiau da Jesus characteristics. All'entschatta dalla passiu e glorificaziun da Jesus stat la damonda da Pieder: «Segner, nua vas?» (Gn 13,36). Cun quella damonda ein aunc biaras autras damondas colligiadas, damondas dallas cuminonzas cristianas da gliez temps, mo era damondas hodiernas – damondas da cardientscha.

Enteifer il discuors denter Jesus e ses giuvnals vegn punctuau che la cardientscha el Bab e la cardientscha en Jesus audan stretgamein ensemen. Quei selai forsa buc tschaffar sulettamein cun igl intelletg ed era buc immediat. Filip e Tumasch han aunc buca cuntonschiu quella enconuschientscha. Ei pretenda ina profunda enconuschientscha, in'enconuschientscha entras s'avischinar ed entras cuminonza, entras intelletg ed experientschas.

Jesus accumpogna nus sin quella via d'enconuschientscha, gie, el ei la via. Nies cor – tenor patertgar semitic il liug da voluntad ed emoziuns – sto buc esser tementaus. Nus stuein buc ver tema, era buc en muments da tristezia.

EVANGELI

Gn 14,1–12

¹Vies cor seigi senza tema! Cartei en Diu e cartei en mei! ²En casa da miu Bab ein bia avdonzas. Sch'ei fuss buc aschia, vess jeu lu detg a vus: Jeu mon a preparar in plaz per vus? ³Inaga che jeu sun ius ed hai preparau in plaz per vus, tuorn jeu puspei e vegn a prender vus tier mei, sinaquei ch'era vus seigies leu, nua che jeu sun. ⁴Vus enconuscheis la via, nua che jeu mon. ⁵Tumasch ha detg ad el: Segner, nus savein buca, nua che ti vas; Co duein nus enconuscher la via? ⁶Jesus ha detg ad el: Jeu sun la via, la verdad e la veta; negin vegn tier il Bab auter che tras mei. ⁷Sche vus veis enconuschiu mei, vegnis vus era ad enconuscher miu Bab. Gia ussa enconuscheis vus el e veis viu el. ⁸Filip ha detg ad el: Segner, muossa a nus il Bab, ed ei fa per nus. ⁹Jesus ha rispundiu: Gia aschi ditg sun jeu cun vus, e ti has buc enconuschiu mei, Filip? Tgi che ha viu mei, ha viu il bab. Co sas ti dir: Muossa a nus il Bab? ¹⁰Creias ti buc che jeu sun el Bab ed il Bab ei en mei? Ils plaid che jeu ditgel a vus, ditgel jeu buca da mei ano. Il Bab che resta en mei, lez fa las ovras. ¹¹Cartei a mi che jeu sun el Bab ed il Bab ei en mei! Mo sche vus carteis buc a mi, cartei per amur dallas ovras! ¹²Pilver, pilver, jeu ditgel a vus: Quel che crei en mei, vegn era sez a far las ovras che jeu fetschel, ed el vegn a far pli grondas che quellas, pertgei jeu mon tier il Bab.